

## Headlines

- 1 बीएसएफ दे महानिरीक्षक डी.के.बूरा होरें आक्खेआ ऐ जे सांबा जिले च अंतराष्ट्रीय बन्ने पर जंदी रातीं मारेया गेदा घुसपैठिया, इलाके दी टोह लैने ते तैनात बलें दी सतर्कता दा अंदाजा लाने लेई भेजेया गेदा होई सकदा ऐ।
- 2 प्रधानमंत्री नरेन्द्र मोदी होरें आक्खेआ ऐ जे जदूं भारत अपनी आजादी दे 100 ब'रे पूरे होने दा जश्न मनाग उसलै ओ इक विकसित राष्ट्र बनी चुके दा होग।
- 3 संवेदनशील जनजातीय समूहें तगर पुज्ज बनाने ते उनेंगी लोकतांत्रिक प्रक्रिया दा हिस्सा बनाने लेई चुनां आयोग चेचे तौरा पर जतन करे करदा ऐ।
- 4 उपराज्यपाल मनोज सिन्हा होरें अज्ज राजभवन श्रीनगर थमां शिडक सुरक्षा बारे इक जागरूकता टूर गी झंडी दस्सियै रवाना कीता।

<><><><><><>

## Intruder Samba(byte)

सीमा सुरक्षाबल-बीएसएफ दे जवानें जंदी रातीं सांबा जिले च रीगल सरहदी चौकी दे इलाके थमां भारत च घुसपैठ करदे करदे इक घुसपैठिए गी मारी मकाया। बीएसएफ दे आईजी डी.के.बूरा होरें दस्सेआ जे 125 बटालियन दे जवानें अंतराष्ट्रीय बन्ने पर किश संदिग्ध नकलो-हरकत दिक्खने परेंत घुसपैठिए गी रुकने लेई आक्खेआ पर बार-बार चुनौती दित्ते जाने दे बाद बी ओह जिसलै नेई रुकेआ तां बीएसएफ दे जवानें उसी गोली मारी दित्ती। आईजी बूरा होरें आक्खेआ जे बीएसएफ दे सौहगे जवान हर चाल्ली दी चुनौती कनै निबडने लेई तैआर न। इस बारे होर मती जानकारी दिंदे होई उनें गलाया.....बाईट

<><><><><><>

## PM-Development

प्रधानमंत्री नरेन्द्र मोदी होरें देशवासिएं गी जकीन दोआया ऐ जे जिसलै भारत अपनी अजादी दे सौ ब'रें दा जश्न मना करदा होग, तां उसलै ओ इक विकसित मुल्ख बनी गेदा होग। मोदी होर अज्ज गुजरात दे सुरेन्द्र नगर ते आनंद च इक दे बाद इक चुनां रैलिएं गी संबोधत करदे होई एह गल्ल आक्खी। उनें आक्खेआ जे पिछले 10एं ब'रें दरान मुल्खै नै एनडीए दे राज च बड़ा मता बदलाव दिक्खेआ ऐ। उनें गलाया जे भारत कुल संसारी सतह दे मामले च इक महत्वपूर्ण म्याल बनी गेदा ऐ ते दुनिया दे बड्डे बड्डे मुल्ख अंतराष्ट्रीय मसलें ते तनाजे गी हल्ल करने लेई भारत गी पैंची करने दी गुजारश करा करदे न। उनें आक्खेआ जे दुनिया च भारत दी साख, ओहदा रूतबा ते रसूख पिछले 10एं ब'रें च जिन्ना बधेआ ऐ ते जिस स्तरै पर पुज्जी गेदा ऐ ओ एहदे शा पैहले कदें नेई हा। कांग्रेस पार्टी दिएं नीतिएं दी सख्त नुक्ताचीनी करदे होई मोदी होरें आक्खेआ जे इस पार्टी नै देश दे कमजोर, दबोए लतडोए दे ते पिछड़े वर्गें दी भलाई बेहतरी लेई किश नेई कीता ते हून अपने सियासी मफाद हासल करने लेई गरीबें दा शोषण करा करदी ऐ ते होरने पिछड़े वर्गें यानि ओबीसी समुदाय कनै बेन्यायी करा करदी ऐ। मोदी होरें अगे आक्खेआ जे उंदी सरकार धर्म दे नां पर आरक्षण दिएं कोश्टें गी कदें कामयाब नेई होन देग। तोआई कांग्रेस दे वरिष्ठ लीडर ते राजस्थान दे साबका मुख्मन्त्री अशोक गहलोत होरें अज्ज अहमदाबाद च इक प्रेस कांफ्रेंस गी संबोधत करदे होई जकीन दोआया जे कांग्रेस दा घोषणा पत्र समाज दे हर इक वर्ग गी बरोबरी ते न्याह दोआने दी गरंजी दिंदा ऐ। अशोक गहलोत होरें मुल्खै च लोकतंत्र दी सुरक्षा पर चिंता प्रगट करदे होई आक्खेआ जे बीजेपी दे राज च लोकतंत्र खतरे च ऐ ते बीजेपी मैहगाई ते बेरोजगारी दे मुद्दे परा लोकें दा ध्यान भटकाने लेई लोकें गी गुमराह करै करदी ऐ। इससै चाल्ली आम आदमी पार्टी दी नेता सुनीता केजरीवाल होरें अज्ज दिल्ली च चुनां प्रचार कीता। उनें अपनी पार्टी दे भावनगर थमां मेदवार

उमेश मकवाना हुंदे हक्कै च इक रोड शो बी कीता। लोकसभा चुनाएं दे अगले गेड़ लेई चुनां प्रचार जोरें—शोरें जारी ऐ ते हर इक पार्टी मतदाताएं गी अपने हक्कै च करने लेई अपनी पूरी टिल्ल ला करदी ऐ।

<><><><><><>

### **Bihar Rajnath**

बीजेपी दे वरिष्ठ नेता ते रक्षा मंत्री राजनाथ सिंह होरें आक्खेआ ऐ जे अपने त्रीये कार्यकाल दरान प्रधानमंत्री नरेन्द्र मोदी होर बरें 2027 तगर भारत गी दुनिया दी त्रीये नंबरै दी सब्बनें शा बस्डी अर्थबवस्था बनाई देंगन। उनें दोष लाया जे कांग्रेस ते आरजेडी बिहार च लालटेन आला दौर वापस आहन्ना चाहंदे न। सरन निर्वाचन हल्के दे छपरा इलाके च इक जनसभा गी संबोधत करदे होई श्री सिंह होरें आक्खेआ जे कांग्रेस आरक्षण, धर्म ते संविधान दे नांह उप्पर लोकें दी अक्खीं च घूड़ चौकना चाहंदे न। राजनाथ होरें आक्खेआ जे प्रधानमंत्री मोदी होर देसै दे विकास लेई समर्पित न।

<><><><><><>

### **UN-India Paestic**

संयुक्त राष्ट्र च भारत दी स्थाई प्रतिनिधि रुचिरा कम्बोज होरें आक्खेआ ऐ जे भारत पलस्तीन ते इजराइल दी समस्या दा हल्ल “दरुं मुख्खें” आली बवस्था गी मनदा ऐ ते एहदे लेई वचनबद्ध बी ऐ। संयुक्त राष्ट्र महासभा च उनें आक्खेआ जे भारत जिस हल्ल दा समर्थन करदा ऐ ओहूदे मूजब फलस्तीन दे लोक सुरक्षत सीमाएं च इक अजाद मुख्ख च निश्चित होइयै रेही सकदे न। रुचिरा कम्बोज होरें 7 अक्टूबर 2023 गी हमास आस्सेआ इजराइल पर कीते गेदे हमले दी बी निंदेया कीती। उनें आक्खेआ जे हर चाली दे हालात च हर कुसै गी अंतर्राष्ट्रीय कनून ते टकोहदा करियै मनुक्खी कनूनें दा सम्मान करना लोड़चदा। उनें आक्खेआ जे भारत नै गजा च बंधक बनाए गेदे इजराइलिंगे गी बिजन शर्त रिहा करने दी बी मंग रखी। मनुक्ख सहायता बारे भारतीय प्रतिनिधि होरें आक्खेआ जे भारत भेजना जारी रखोग। उनें आक्खेआ जे हालात गी होर बिगड़ने कोला बचाने लेई गजा च लोकें गी दित्ती जाने आली सहायता गी तुरत बधाने दी लोड़ ऐ। रुचिरा कम्बोज होरें मेद प्रगट कीती जे संयुक्त राष्ट्र दा पक्का मिंभर बनने लेई फलिस्तीन दे जतनें गी समर्थन थहोग। पिछले म्हीने अमरीका नै फलिस्तीन गी इक राज्य/देश दा दर्जा देने सरबंधी संयुक्त राष्ट्र सुरक्षा परिषद दे प्रस्ताव गी वीटो करी दित्ता हा जेहदे पर फलिस्तीन दे समर्थक केई मुख्खें अपनी त्रिक्खी प्रतिक्रिया दित्ती ही

<><><><><><>

### **DEO Baramulla(byte)**

बारामुला संसदी हल्के दे रिटर्निंग अफसर मिंगा शेरपा होरें आक्खेआ ऐ जे इस हल्के लेई नामजदगियां हासल करने दी खीरी तरीक 3 मई ऐ। उनें दस्सेआ जे अजें तगर कुल 10 मेदवारें अपनी नामजदगी दाखल कीती दी ऐ। शेरपा होरें इब्बी दस्सेआ जे चुनां प्रक्रिया लेई सब्बै तैआरियां बवस्थित ढंगै सिर चलै करदियां न। उनें दस्सेआ.....बाईट

<><><><><><>

### **SVEEP-Poonch(byte)**

पुंछ जिले दी मेंढर सब-डिवीजन च जिला प्रशासन दे सैहयोग ते समर्थन कन्ने “स्वीप” कार्यक्रम तैहत इक जागरूकता रैली दा सरिस्ता कीता गेआ। जिसी तैहसील दफतर मेंढर थमां एसडीएम इमरान रशीद होरें झंडी दस्सियै रवाना कीता। जिला विकास कमीशनर हुंदे निर्देशें मूजब केई सरकारी ते प्राइवेट स्कूलें बी एहदे च हिस्सा लैता। हत्थें च वोट पाने दा महत्व बारे नारे लिखी दियां तख्तियां फगड़े दे रैली च शामिल लोकें रस्ते च लोकें गी वोट पाने दे अधिकार गी अपना फर्ज मन्नदे होई इस्तेमाल करने दी अपील कीती। साढ़े जिला संवाददाता अनुभव मिसरी कन्ने गल्ल करदे होई स्वीप कार्यक्रम दे जिला अफसर बिशम्बर दरान होरें आक्खेआ.....बाईट

<><><><><><>

### **EC-PVTG**

चुनां उसलै होर मते असरदार बूमतलब ते प्रासंगित होई जंदे न जिसलै आम जनता इंदे च बधी चढ़ियै हिस्सा लैदी ऐ चुनां च जनता दी मती शमूलियत जकीनी बनाने लेई निर्वाचन आयोग केइए दहाकें थमां अनकथ जतन करदा आवै करदा ऐ आयोग समाज दे मते कमजोर जनजातीय तबकें गी जागरूक करने ते उनेंगी बी मुख्खधारा कन्ने जोड़ने लेई अनकथ जतन करदा आवा करदा ऐ तां जे ओब्बी इस लोकतांत्रिक प्रक्रिया दा इक महत्वपूर्ण हिस्सा बनियै लोकतंत्र गी मजबूती देने दी प्रक्रिया दा अहम

हिस्सा बनी सकन। आकाशवाणी दे संवाददाता नै जानकारी दित्ती ऐ जे पिछले दऊं ब'रें दरान चुनां आयोग नै इत्त भेड़ा निगगर गैई पुट्टियां न, टकोहदा करियै मते संवेदनशील जनजातीय तबकें गी चुनावी प्रक्रिया च शामिल करने लेई जेह्दे लेई उनेंगी जागरूक करने, उंदे नां दर्ज करने, उनेंगी वोट ते चुनां दी प्रक्रिया, महत्व ते मकसद बारे समझौने लेई विशेष अभियान चलाए गे। उंदे तगर पुज्जियै विशेष केंपें राए उनेंगी जागरूक ते प्रेरत कीता जेह्दे नतीजे च इस समुदाय कन्नै तालुक रखने आले योग्य मतदाताएं दा कर्नाटक ते ओडिशा च 100 प्रतिशत पंजीकरण दर्ज कीता गेआ ऐ। एह्दे इलावा केरल, तमिलनाडू, बिहार ते झारखंड च बी इनें कोश्टें दे असरदार ते दिल बधाने आले नतीजे सामने आवा करदे न।

<><><><><><>

### LG-RSA

उपराज्यपाल मनोज सिन्हा होरें अज्ज राजभवन श्रीनगर थमां शिड़क सुरक्षा सरबंधी जागरूकता आले टूर दी झंडी दस्सियै रवाना कीता जेह्दा मकसद बेशकीमती मनुक्खी जिंददगिएं गी बचाने बारे लोकें अंदर जागरूकता पैदा करना ऐ। उपराज्यपाल होरें कश्मीर रोड सेफ्टी फाउंडेशन दी इस पैहलकदमी दी सराहना कीती। ध्यानजोग ऐ जे मिशन सेव रीवर जेएंडके टूर 2024 प्रदेश दे सब्बनें जिलें च जाग ते लोकें गी शिड़क सुरक्षा बारे जागरूक बनाने दा कम्म करोग। उपराज्यपाल मनोज सिन्हा हुंदे प्रधान सचिव डॉ. मनदीप कुमार भंडारी, कश्मीर रोड सेफ्टी फाउंडेशन दे प्रधान नासिर अली खान ते होर बी केई ऐह्लकार उत्थें मजूद हे।

<><><><><><>

### LG-Delegation

जेएंडके सिक्ख कोआर्डिनेशन कमेटी दे प्रधान सरकार अजीत सिंह होरें अज्ज राजभवन श्रीनगर च उपराज्यपाल मनोज सिन्हा हुंदे नै मलाटी कीती। इस मौके सरकार बलबीर सिंह होर बी उंदे कन्नै हे जेह्ड़े आर.एस.पुरा दे मंगोवाली दे बसनीक अवतार सिंह हुंदे पिता न, जिंदी जम्मू दे ग्रेटर कैलाश च हत्तेया करी दित्ती गेई ही। उनें उपराज्यपाल होरें गी इस हत्तेया आले मामले दी तफसीली ते निरपक्ख जांच करोआने दी मंग कीती। उपराज्यपाल होरें मौके पर गै जरूरी निर्देश जारी कीते ते उनेंगी हर मुमकन मदाद ते सैह्योग दा जकीन दोआया। जम्मू कश्मीर पुलस दे डरैक्टर जनरल आर.आर.स्वैन होर बी इस मौके पर उत्थें मजूद हे।

<><><><><><>

### Drugist Reasi(byte)

रियासी दे जिला मैजिस्ट्रेट विशेष महाजन होरें स्कूलें ते कालजें च नशे दे शकार नोजवानें दा पता लाने लेई "ड्रग किट" दा इस्तेमाल करने पर जोर दित्ता। उनें इलाके च फहीम दी खेती आले इलाके पर बकायदयी कन्नै तक्क रखने पर जोर दित्ता ते सड़कें कंडे बरोस करने आली भंग गी पुट्टी सुट्टने दा बी निर्देश दित्ता। इस बारे मीडिया कन्नै गल्ल करदे होई विशेष महाजन होरें आक्खेआ.....बाईट

<><><><><><>

### Adventure Kishtwar

साहसिक खेड्डें ते गतिविधिएं गी बढ़ावा देने आले भ्यालें, एडवेंचर एन्थूसियास्ट जिंदे च असिकिनी एडवेंचर ते एक्सट्रीम एडवेंचर बी शामिल न, नै जिला प्रशासन किशतवाड़ कन्नै मिलियै गुलाबगढ़ पाड्डर कश चिनाह दरेया पर रिवर राफ्टिंग दा कार्यक्रम बनाया ऐ। इस आयोजन दा मकसद इलाके च सैलसफा ते टकोहदा करियै साहसिक सैलसफा सरबंधी गतिविधिएं गी बढ़ावा देना ऐ। साढ़े जिला संवाददाता कैलाश नाथ नै जानकारी दित्ती ऐ जे मकामी लोकें ते बच्चें लेई सर्कस, ठैहरने लेई टैंट ते मनोरंजन गतिविधिएं लेई पंडाल बी लाए गेदे न। दऊं हफते दे इस राफ्टिंग उत्सव च दूरा दूरा लोक ते रैफ्टिंग दे शौकीन आवा करदे न। इस मौके जिला विकास कमीशनर किशतवाड़ डॉ. देवांश यादव, किशतवाड़ विकास प्राधिकरण दे मुख्क कार्रकारी अधिकारी डॉ. श्रुषि कुमार शर्मा, पाड्डर दे एसडीएम अमित कुमार ते होर दुए केई अफसर बी इस मौके उत्थें आए दे हे।

<><><><><><>